



3. januar 2011

Inatsisartut suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppara:

Naalakkersuisunut apeqqut:

Kalaallit Danmarkimi palasiata nunatsinnit aningaasaliiffigineqartarunnaarnissaa Naalakkersuisunit suli anguniagaanerluni? Taamaappat suut tunngavilersuutigalugit?

(Inatsisartuni ilaasorta, Doris Jakobsen Siumut)

Tunngavilersuut:

9. november 2010 Folketingimi Lars-Emil Johansen-imut paarlattaallunga, nunatsinni Inatsisartunut tusagassiutinullu saaffiginnissuteqarpunga, Danmarkimi kalaallit ilagiit palaseqartitaanerisa 2011-miit Naalakkersuisuniit atorunnaarsinniarneqarnerat itigarteqqullugu.

2010-mut Aningaasanik Inatsisissaq 10. november 2009 Inatsisartuni aappassaaneerlugu taasissutigineqarmat aammalu 27. november 2009 pingajusaaaneerlugu taasissutigineqarmat, nuannaarutigeqisannik paasivara itigartitseqqusinera iluatsissimasoq, tassalu qulakkeerneqartoq Danmarkimi kalaallit ilagiit siunissami palaseqaannarnissaat.

Tamatumali kingorna tupaallaatigisannik tusarpara, Danmarkimi palasi Namminersorlutik Oqartussani atorfilittamik allaffigineqarsimasoq siunissami kalaallit Danmarkimi palaseerunnissaat suli siunertaasoq.

Piffissami ungasinngitsumi Danmarkimi kalaallit palasiat attaveqarfigeqqippara, paasitinneqarpungalu Danmarkimi kalaallit palasiata nunatsinnit aningaasalersugaanera suli atorunnaarsinniarlugu sulisoqartoq. Isumaqarpungalu tamanna ajuusaarnarluinnartuusoq tassami Danmarkimi kalaalerpassuit najugallit pisariaqartitsisut amerlaqimmata.

Ullumikkut kalaallit Danmarkimi najungaartut aammalu ilinniartut, peqqissartut, napparsimavissuarmi uninngasut paarnaarussat, tarnimikkut timimikkullu napparsimasut amerligaluttuinnarput.

Malitsigisaanik kalaallit Danmarkimi kuisittartut, apersortittartut toqusartullu aamma ikiliartunngillat.

Kalaallit Rigshospitaalimi uninngasut aammalu peqqissartut ilarpassui ajoraluartumik Danmarkimi toqusarput taakkualu suli uumatillutik ilaqutaasalu palasimik kalaallisut oqalussinnaasumik oqaloqateqarnissartik ikiorneqarnissartik assorsuaq pisariaqartittarpaat minnerunngitsumik aamma tarnimikkut napparsimasut, timimikkut innarluutillit paarnaarussallu eqqarsaatigalugit.

Qulaani tunngavilersuutigisakka innersuussutigalugit matumuuna Naalakkersuisunut apeqquteqaatigissavara, Danmarkimi kalaallit siunissami palaseqaannarnissaat qulakkeerniarlugu Inatsisartunit piumasqaataanikoq Naalakkersuisut atorunnaarsinniarneraat?